

ሚኪያሳ ተንቢቱ ጌዶ ቆፋ

ሚኪያሲ ኢሳያሳይ ዲዛ ዋዴ ዲዛ ናቤ ጌዲሺን ኢዛሰ ዩሌታይ ዲጌሃ ባጋ ዩሁዳን ካዎቲላ ጋርሳን ዲዛ ኢሲ ዴሬ ጋርሳን ዲዛ ካታማን ዴሰ፤ እሞጾይ ቼዴሃ ባጋ ካዎቲላ ቦላ ሜቶይ ጋካናይሳ ዮቶይሳላ ሚኪያሲካ ሄ ሃኖቲ ዩሁዳ ካዎቲላ ቦላ ጋካናይሳ ካሴቲ ዮቲዴሰ። ዴሬዚ ኦሊዛ ኢታ ሃኖቲ ፒርዳ ፓጩ ጌሻሰ ጸሲ ባ ፒርዳ ኤሃናይሳ ቆፍሲዴሰ፤ ጌዶ እቲን ሚኪያሳ ተንቢቱ ቃላይ ሲንላፌ ሂዶታይ ዲዛይሳ ቤሲዛ ማላታታካ ጋሊ ኦይኪዴሰ። ሃራፔካ ሎኤሊ ዴላናሰ ቤሲዛ ኪፊሌቲ ጸሳ ጎዳቲላ ጋርሳን ኩሜላ አላሜን ሳርቲሊ ዳናይሳ (4:1-40)፥ ዳዊቲ ዜሬላፌ ጌታ ካዎይ ዩኮ ዴሬዛሰ ሳርቲሊ ኢሜታናይሳ (5:2-40) ሄሳላካ ካሴ ኢሰራኤሌ ናቤቲ ዮቲዳ ቃላይ ኡባይካ ኢሲ ጸቂሴን ቃሹቲዳ ማላ ቆንጩሴቲሰ፤ ሂና ሄ ጸቂሴያካ፥ «ኢዚ ኑፔ ኮይዛይሳ ኑ ኦላና ማላ፥ ኪያቲሊ ኩሚዳ ሲቆ ኑ ቤሳና ማላኔ ኑኒ ኑ ጎዳራ ኩሜላ አሽኬቲላን ዳና ማላሳ።» [6:8]

ሃ ማጻፋይ ኦይኪዳ ኩሜላ ቆፋ

ጎዳይ ባ አሳ ቃጸዬሰ 1:1—2:11

ሲንሳራ ዲዛ ሂዶታ 2:12-13

ጸሲ ዴሬ ካሌሊዛ ኢታታኔ ዋርዶ ናቤታ ቃጸያና 3:1-12

ኦራላ ኢሰራኤሌን ጸሳ ኬላ ኦራላ 4:1—5:15

ኢሰራኤሊይ ኦሊዳ ቆሆ ቆንጩላ 6:1—7:7

ዴሬዚ ጸሳኮ ሲሞ 7:8-20

¹ ዩሁዳ ካዎ ኢዮአታሜ፥ አካዜኔ ሂዘቂያሳ ዋዴ ሞሬሹቲ አሰ ጌዲዳ ሚኪያሳኮ ሳሞሪያ ጌሻሲኔ ዩሩሳላሜ ጌሻሰ ዩዳ ጸሳ ቃላይ ሃይሳ፥

² ኢንቲኖ ዴሬቶ፤

ኢንቲ ዉሪካ ሲዩቲ!

ሃ ቤታ ቦላ ዲዛይቲ ዉሪካ

ሃ ኤዘጊ ሲዩቲ፤

ሳሎ ጎዳይ ባ ጌሻ ኬላን

ኡቲዲ ኢንቴ ኢታ ኦሶዛ
ኢንቴ ቦላ ማርካቴስ።

ሳማሪያ ቦላኔ ዩሩሳላሜ ቦላ ዪዳ ፒርዳ

3 ሄኮ ጸሲ ባ ዲዛሶፔ ያና፤

ዪዲካ ቢታ ቦላን

ጶቃሶሆን

ጶቃሶሆን ሄሜታና።

4 ሙቃዳይ ታማ ቤኢዲ

ሴሪዛ ማላኔ

ሃላ ኣፎራ

ዲጌ ጎጊዛ ማላ

ሄ ዋዴ ዙማቲ

ኢዛ ቶሆ ጋርሳን ሴራና፤

ሾባቲካ ጳልቄቲ

ዋዳና።

5 ሄሲ ወሪ ሃናናይ ያቆቤይ ኦሊዳ ሞሮ ጊሻሲኔ ኢስራኤል ናይታ ናጋራ ጊሻሳ፤ ኢስራኤል ኣሳይ ኢታ ኦላናስ ጋሶ ጊዲዳይ ኦኔ? ኢዚስ ዋና ካታማዮ ሳማሪያ ጊዴኬ? ዩሁዳ ኣሳይ ኤቃ ጎይኒዲ ናጋራ ኦላና ማላ ጋሊዳይ ኦኔ? ዩሩሳላሜ ጊዴኬ?

6 ሄሳ ጊሻስ ታኒ ሳማሪያ ኬል ላሌቲዳሶኔ ዋይኔ ሚሊ ቶኬቲዛሶ ኬሳና፤ ኢዛ ኬጾቲዳ ዮቻ ሹቻ ታ ዲጌ ሾባን ኦላናኔ ኢዚ ጸጸ ሾዳ ዳይሳና።

7 ኢዚ ኤቃቲ ወሪካ ሜቄሬታና፤ ኢዚ ኤቃ ኬላን ዲዛ ላይማቲዛይታስ ኢሜቲዳዚ ወሪ ታማን ጸጌታና፤ ኢዚ ሚሰሌታካ ኡባ ታ ዳይሳና፤ ኢዛ ባስ ኢሜቲዳይሳ ላይማን ሺሺዳ ማላ ሃኢካ ኢዚስ ዲዛዚ ላይማን ኤኪዛዝ ጊዳና።

ዩሆኔ ጨጨ

8 ሄሳ ጌዶን ታኒ ዩካይስ፥ ወ! ወይ ጋይስ፤ ታ ጫማይ ባይንዳ ሜላ ቶሆኒኔ ሜላ ካሎ ባይስ፤ ዋራካና ማላ ዋሳይስ፤ ጉቶ ማላ ዋሳይስ።

9 ኢዚ ማዲንሳይ ፓጽንታዝ ጊዳና፤ ኢዚፔ ኣጲ ዩሁዳሳራ ጊዳና፤ ታ ዴሬይ ጌሊዛ ፔንጌ ዩሩሳላሜ ጋኪዴስ።

10 ጌቴ ዴሬን ሃሳዮፒቲ፤ ዩሆ ሙሌካ ዩኮፍቲ፤ ቤቲ-ሊኦፋራን ጉዲላ ቦላ ጌንዴሬቲ።

11 ኢንቲኖ ሻፊሬን ዲዛይቶ ማይኦይ ባይንዳ ካሎ ዩላቲሺ ኣጲቲ፤ ጸኢናን ዲዛይቲ ሄፔ ኬዜቲና፤ ቤቲ-ኤዜሌይ ጨጨ ቦላ ዳወስ፤ ኢንቲስካ ጋኪ ሺሞፓናሶ ጊዳናስ ዳንዳዩኩ።

12 ሜቶፔ ሸምፓናስ ኮሻን ማሮቲን ዲዛይቲ ሜቶን ዋዬቴቴስ፤ ሄሲካ ዬሩሳላሜ ፔንጌ ጋካናስ ኢታ ሜቶይ ጸሳ አቻፌ ዪዳ ጊሻሳ።

13 ኢንቴኖ ላኪሼን ዲዛይቶ ፓራታ ጋሬራ ጋሊ ኦይሴሊቴ። ጸዮኔ ማጫ ናይታስ ኮይሮ ናጋራይ ኢንቴናኮ። ኢስራኤሌስ ቆሆይ ኢንቴ አቻፌ ቤቲዴስ።

14 ሄሳ ጊሻስ ኢንቴ ሞሬሼት-ጋቴስ ኢሞታ ኢማና፤ አኪዚቤ ካታማይ ኢስራኤሌ ካዎታ ባሌሊዛ ካታማ ጊዳና።

15 ኢንቴኖ ማሬሻን ዲዛይቶ! ታ ኢንቴና ጸኒዛዴ ኢንቴ ቦላ ኤሃና፤ ኢስራኤሌስ ቦንሾ ጊዲዳዚ አዲላሜ ሃ ያና።

16 ኢንቴ ኢስታን ኡፋዬቲዛ ኢንቴ ናይቲ ኢንቴፌ ዲኤቲ ባና ጊሻስ ኢንቴ ሁኤ ቡሉሲቴ።

2

አሳ ቆፋኔ ጸሳ ቆፋ

1 ኢታ ኦላናስ ቆፒዛይታሲኔ ሂጸን ዲሼ ጌኔ ኦላናስ ዮኦ ቱኪዛይታስ አዬ አና! ኦማርስ ቆፖይሳ ማላዶ ዋንታራ ፖሌቴሲኔ ሄሳ ኦላናስካ ዋልቃራ ዴቴስ።

2 አሳ ጋዴ አሞቲዳ ማላ ኦይኬቴስ፤ አሳ ኬሊካ አሞቲዲ ኤኬቴስ፤ ባ ላጌ ኬሊኔ ቢታ ባሌሶን ኤኬቴስ።

3 ሄሳ ጊሻስ ጸሲ፥ «ሄኮ ታ ሄሳ ማላ ዴሬ ቦላ ጳይሲዛዝ ኤካ ያና ቆፓዲስ፤ ኢንቴ ቃሴ ሄሳፌ ኬሲ ኤካና ዳንዳዬኬታ፤ ኢንቴ ቦላ ሜቶይ ዪዛ ጊሻስ ሄሳፌ ጉዬ ኢንቴ ኦቶሬቴላን ሲሜሬቴኬታ።

4 ሄ ዋዴ ዴሬይ ኢንቴ ቦላ ሚጪ ካኦና፤ ኢንቴና ቂጲሼ፥
« ሱ ሙሌራ ጳይዶስ፤

ታ ዳቦ ጋዴይ ሃራስ ጊሼቲዴስ፤

ታፔ ቦንቂ ኤኪዲ

ኑ ቢታ ኑና ጸኒዳይታስ

ጊሺዴስ፥ ጊ ዚላላና» ጊዴስ።

5 ሄሳ ጊሻስ

ጸሳ ዲላታ ጊዶን

ጋዴ ሳማ ዬጊ ጊሻናዴይ

ኦኒካ ዴና።

ዋርዶ ናቤታ

6 ኢስታ ናቤቲ፥ «ተንቢቱ ኑ ቦላ ዮቶፓ፤ ሄይታንታ ጊሻስ ተንቢቱ ኑስ ዮቶፓ፤ ኑ ቦላ ካዉሻቴሊ ጋከና» ጋና።

7 «ያቆቤ ሶ አሳቶ ሄሳሶ ጌቱታናስ ቤሲዜ? ጸሳ አያናይ አጊ አጃሬኔ? ሄይታንታ ማላካ ኦሊዜ?» ጊ ኦይቻና፤ «ሱሬ ኦጌ ሄማቲዛይታስ ታ ቃላይ ሎኦ ኦሊ ኤሬኔ?

8 ወርሴላን ኢንቱ ታ ዳሬታ ቦላ ሞርኬ ጊዲ ዳንዲዳታ፤ ኢስታስ ኦላ ቆፋይ ባይንዳ ዲሺን ሳርቴላራ አጃዛይታ ቦላፊ ሴሎ ማይኦ ኢንቱ ቃሪ ኤኪዳታ።

9 ኢስቲ ዶሲዛ ኢስታ ከላፊ ታ አሳ ማጫ ናይታ ከሲ ኤፊዳታ፤ ታ ቦንቸካ ኢስታ ናይታፔ ሜርናስ ኤኪዳታ።

10 ዳንዲዲ ሄሳፊ ኪቺቲ፤ ሄሲ ኢንቲስ ሸምፖሶ ጊዳና፤ ጋሶይካ ቱኒዳሲኔ ዳር ሞሬቲዳስ።

11 ባሌሊዛ ሞርዶ አሲ ዪዲ፥ ሩዳር ዋይኔ ኡሹ ጊሻሲኔ ማሶሲዛ ኡሻ ጊሻስ ጊዲ ተንቢቱ ኢንቲስ ዮታና፤ ጊኮ ሃይሳ ዴሬዛስ ዶሴቲዳ ናቤ ጊዳና።

አስ አሻናስ አማቲዳ ሂዳታ

12 «ያቆቤ! ቱማፔ ታ ኢንቲና ኢሲሶ ሺሻና፤ ኢሰራኤሌታፔ ኦቲዳይታ ታ ኢሲ ቦላ ኤሃና፤ ዪሬ ጊዶን ዲዛ ሜሄ ማላኔ ዳምባን ሄማቲዛ ሜሄ ማላ ታኒ ኢንቲና ኢሲ ቦላ ሺሻና፤ ኢንቲ ዴሬይ ዉሪ አስ ጸሳ ጊዳና።

13 ሜንሊዛይ ኢስታፊ ካሴቲ ኬዚ ባና፤ ኢስቲካ ፔንጌዛ ሜንሊዲ ኬዚ ባና፤ ኢስታ ካዋይ ጸሳይ ኢስታፊ ሲንሌ አጃ ካሌላና» ጊዳና።

3

ኢታ ኦጌ ካሌሊዛይታኔ ሞርዶ ናቤታ ቦላ ጸሳ ሃንቆ

1 ቃሴካ፥ «ኢንቲኖ ያቆቤ ካሌሊዛይታኔ ኢስራኤሌ ከላ አሳ ሃሪዛይቶ ሲዪቲ፤

ኢንቲ ቱሙ ፒርዳ ኤራናስ

ኢንቲስ ቤሴኔ?

2 ኢንቲ ሎኦ ኢጺዳታ፤

ኢታ ቃሴ ዶሲዳታ፤

ታ አሳ ጋልባ ሾቂዳታ፤

ኢስታ አሾካ

ሜቁላፊ ሻኪዳታ።

3 ታ አሳ አሾ ሚዳታ፤

ጋልባካ ሾቂዳታ፤
ኢስታ ሜቄሴካ
ሚንፊሬሴዳታ፤
ኣሾ ጫጪዛ ባሼን
ጫጪዛ ማላኔ
ዲሰቲን ደይሲዛ ኣሾ ማላ
ቃንጾሬሴዳታ» ታ ጋዲሰ።

- 4 ኢስቲካ ፑዴ ጸሳኮ
ዋሳና ሸን
ጸሲ ኢስታ ዋሶ ሲዬና፤
ኢታቴላ ጊሻስ ሄ ዋዴ
ጸሳይ ባ ኣይፌሶ
ኢስታፌ ሃራሶ ዛራና።
- 5 ጸሲ፥ «ታ ዴሬ ባሌሴዛ ናቤቲ
ኣሲ ኢስታ ሚዚኮ፥
«ሳሮቴሴ ዴሰ» ጌቲሰ።
ሙዝንታ ኣጊኮ ቃሴ፥
«ኦላይ ዩሰ»
ጌ ኣዋጃናሰ ዴንዴቲቲሰ።
- 6 ሄሳ ጊሻስ ኢስታ ቦላ
ቃማይ ቤቶንታ፥
ቋማይ ኤሮንታ ጋኪ
ዋዳና፤
ናቤታ ቦላ ኣርሼይ ጌላናኔ
ጋላሳይ ኢስታሰ ቃማና።

- 7 ቡሮ ማሮቲዛይቲ ካዉያና፤
ቲንቢቲ ዮቴዛይቲ ዩላታና፤
ወሪካ ባ ኣይፌሶ ካማና፤
ጋሶይካ ኢስታሰ ዛሮይ
ጸሳ ኣቻፌ ባይንዳ
ጊሻሳ» ጌዴሰ።

- 8 ታ ቃሴ ያቆቤሰ
ኢዛ ቆሆዛ፥
ኢስራኤሌሲካ
ኢዛ ናጋራ ዮታናሰ
ዋልቃን፥ ጸሳ ኣያናን፥
ቱማ ፒርዳኒኔ

- ሚኖቴላን ኩማዲስ።
- 9 ኢንቴኖ ያቆቤ ሶ አሳ
ካሌሊዛይቶ!
ኢንቴኖ ኢስራኤል ዴሬ ሃሪዛይቶ!
ቱሙ ፒርዳ ካቂዛይቶ!
ቱሙ ገዲዳዝ
ኡባ ሚርቂዛይቶ!
ኣኔ ሲዪቴ።
- 10 ጸዮኔ፥ አሳ ሱሉ ጉሶኒኔ
ዩሩሳላሜ ኢታቴላን
ኩንሊዛይቶ!
ኣኔ ሲዪቴ።
- 11 ካሌሊዛይቲ ማታኤስ ፒርዴቴስ፤
ቄሴቲ ሚሻ ገሻስ
ታማርሴቴስ፤
ናቤቲካ ሚሼ
ሚዳ ገሻስ ዮቴቴስ።
- ሄሳ ኡባ አሊዲካ፥
«ጸሲ ኑ ገደን ዴስ ገዴኔ?
ኣይ ኢታይካ ኑ ቦላ ጋኬና» ገሼ
ጸሳን ጨቄቴቴስ።
- 12 ሄሳ ገሻስ ኢንቴ ጌደን
ጸዮኔይ ጎሻ ቢታ ማላ
ጎዬታና፤
ዩሩሳላሜይካ ቆሌቲዳ
ኬላ ዶሬ ገዳና፤
ጸሳ ኬላይ ዲዛ ዙማይካ
ሻራፋ ማታይ ኢዛ ቦላ
ዲጨዳ ዙማ ገዳና።

4

- ጸሳ ዙማ
- 1 ወርሴላ ዋዴ
ጸሳ ኬሊ
ኢዛ ቦላ ዲዛ ዙማይ
ሃራ ዙማ ኡባፌ
ኣቂ ቤታና፤

- ሃራ ዙማታፔ ቦላራ
 ቶቁ ጋና፤
 ዴሬይካ ኢዛኮ ጎቻና።
 2 ዳር ካዎቴላቲ ኢዛኮ ዪዲ፥
 «ጸሳ ዙማኮ ሃ ዪቴ፤
 ያቆቤ ጎዳኮ እኔ ቦሰ፤
 ኑ ኢዛ ኦጌራ ባና ማላ
 ኑና ኢዚ ባ ኦጌ
 ታማርሳና» ጊዳ፤
 ዋጋይ ጸዮኔፔ፥ ጸሳ ቃላይ
 ቃሴ ዬሩሳላሜፔ ያና።
 3 ኢዚ ዳር አሳ ጊደን ፒርዳና፤
 ሃሆኒኔ ማታን ዲዛ
 ዋልቃማ ካታማ ጊደን ዲዛ
 ኦሽ ኤሳና፤
 ኢሰቲ ባ ጊላ
 ማሻ ማራሻ፥
 ባ ቶራካ ባጫ ሂሰቲ ቆጸና፤
 ኢሲ ካዎይ ሃራ ካዎ ቦላ
 ማሻ ዴንፔና፤
 ሄሳፌ ጉዬ ኢሰቲ
 ኦላ ቲሚርቲ ታማሬቴና።
 4 ኢሲ አሲ ባ ዎይኔ ሚላ ጋርሳንካ
 ባ ባላሴ ሚላ ጋርሳን ኡታና፤
 ኢሰታ ባቢሲዛ ሚሺ ዴና፤
 ኡባፌ ዋልቃማ
 ጎዳ ዶናይ
 ሃይሳ ዮቲዴሰ።
 5 ሃንኮ ዴሬይ ባ ኤቃ ሱንላን ቤሰ፤ ኑኒ ቃሴ ሜርናፔ ሜርና
 ጋካናሰ ኑ ጎዳ ሱንላን ባና።
- ቡሮፔ ሃናና ጸሳ ቆፋ**
 6 ጎዳይ፥ «ታኒ ሄ ጋላሰ ጉንዲዳይታ ሺሻና፤ ቤቴ ቢዳይታኔ
 ሙዙታና ማላ ታ አላ አሚዳይታ ኡባ ኢሲሶ ሺሻና።
 7 ጉንዳታፔ አቲዳይታኔ ቆሂቲዳይታ ታ ኢሰታ ሚኖ ዴሬ ኬሳና፤
 ሄ ጋላሳይፌ ዶሚዲ ሜርና ጋካናሰ ጎዳይ ጸዮኔ ዙማን ኢሰታ
 ቦላ ካዎታና።

8 ሃይሶ ነናን ኡቲዲ ሜሄ ሄሚዛ ጵቃ ዙማዞ! ጲዮኔ ማጫ ናይታ ናጋና ጊጋ ኡቲዲ ዙማዞ! ቤኒ ኔ ሃሪዛ ዳሬይ ኔሰ ሲማና፤ ኔ ካዎቲላይ ዩሩሳላሚ ማጫ ናይሰ ጊዳና።

9 ሂሰቲን ኔ ሃኢ ኣዘሰ ዋሳይ? ኔሰ ካዎይ ባዬ? ኔኒ ሚጻይ ኦይኪዳ ማጫሳይ ማላ ኡንኤቲዳይ ኔና ዙሪዛይ ጳይኔ?

10 ሃኔ ጲዮኔ ማጫ ናዬ! ሚጻቲዛ ማጫሳይ ማላ ኔ ሜቶታና፤ ሃኢ ቃሴ ኔ ካታማፔ ጌዳ ኬዛዳ ጮ ዳምባን ዳኣና ቤሲዛ ጊሻሰ ባቢሎኔ ባና፤ ኔ ሄ ባዳ ሄን ኔ ሞርኬታ ኩሼፔ ኣታና፤ ጎዳይ ኔና ሄን ኔ ሞርኬታፔ ኣሻና።

11 ሃኢ ቃሴ ዳሮ ሃንኮ ዳሬ ኣሳይ ኔ ቦላ ሸቂደሰ፤ ኢሰቲካ፡ ሳና ቱኒዳዝ ጊዳ! ኦ ኣይፊይ ጲዮኖ ቂጴን ጴሎ። ጋና።

12 ጊዳ ኣቲን ኢሰቲ ጸሳ ቆፋ ኤሬቴና፤ ቡኬታናሰ ባሌን ሸቂዛ ሚርቂ ካላ ማላ ባና ሸሺዛዳ ቆፋ ኢሰቲ ኤሬቴና።

13 ሃኔ ጲዮኔ ናዬ ዴንዳዳ ካላ ቡካ፤ ታ ኔሰ ቢራታ ካጮኔ ጸርቂማላ ጸጉንጸ ኢማና፤ ኔካ ሃንኮ ዳሬዛ ኢዛን ሊቂሳና» ጊዴሰ። ኢሰቲ ጌኔን ሺሺዳይሳ ጸሳሰ፡ ኢሰታ ሃርካ ኡባ ቢታ ኡባ ሃሪዛ ጎዳሰ ኔ ሺሻንዳሳ።

5

ቤቴሊሄሜፔ ሃሪዛዳይ ያናይሳሰ እሜቲዳ ሂደታ ቃላ

1 ሃኔ ኔኒ ኦላ ኣሳታ ካታማዬ፡ ኔ ኦላ ኣሳ ዚርሳ። ኦና ኦይካናሰ ዩዩ ኣጳዳ፤ ኢሰራኤሌ ሃሪዛይሳሰ ሻጋላን ጉፊራ ሾጫና።

2 ሃኔ ኔ ቃሴ ቤቴሊሄሜ ኤፍራታ፡ ዩሁዳ ዛርኬታፔ ኔኒ ጉጸ ጊዲኮካ ኢዛሰ ኬሳይ ካሴ ቤኒ ዋዴፔ ጊዲዳ ኢሰራኤሌ ሃሪዛዳይ ኔ ጊደፊ ታሰ ኬዛና።

3 ሄሳ ጊሻሰ ዩሊዛራ ሚጻታዳ ዩላና ጋካናሰ ኢሰራኤሌይ ዩጌታ ኣታና፤ ሃንኮ ኣቲዳ ኢሻቲካ ሲሚዲ ኢሰራኤሌ ኣሳራ ዋላኬታና።

4 ጎዳ ዋልቃን ጎዳ ባ ጸሳ ሱንፋ ጊታቴላን ሚኒ ኤቃናኔ ባ ሜሄ ኢዚ ሄማና፤ ሄ ዋዴ ኢዛ ዋልቃቴላይ ቢታ ጋጸ ጋካና ጊሻሰ ኣሳይ ጊጋ ዱሰ ዳና።

5 ኢሰታሰ ሳርቴላ ኢዛ ጊዳና።

ጎዳይ ኢሰራኤሌ ኣሳ ኣሻናኔ ኢሰታ ሞርኬታ ጳይሳና ኣሶራ ኣሳይ ኦ ቢታ ዋራጂሺን ኦ ሚጻታካ * ሜንፋ ጌሊሺን ላፑን ሄሚዛይታ ሄሳፊካ ኦሰፑን ሃላቃታ ኦ ኢዛ ቦላ ዴንፋና።

5:2 ማቶ 2:6፤ ዮሃ 7:42 * 5:5 ኦ ሚጻታ ጊዛይሳ ካሴ ዋዴ ቢርሼላቲ ኦ ቢታ ጌቴሰ።

6 አሶሬ ዳሬይ ማሻን ናሙሩዴ ዳሬይ ኮሆፔ ሾዴቲዳ ጊላ ማሻን ሃሬታና፤ አሶሬ አሳይ ኑ ቢታ ዋራጂሺኒኔ ኑ ዳስ ቦቺሺን ኢዚ ኑና አሻና።

7 ያቆቤ ዜሬላፌ አቲዳይቲ ዳሮ ዳሬ ጊዶን ጸሳ አቻፌ ዋዲዛ ኢራ ማላ ማታ ቦላ ሎዳራ ፑሲሽ ቢታ ካሌሊዛ ፑሴ ኢራ ማላ አሳፔ አይኮካ ኮዮንታ አሳ ጊዳና።

8 ዋራ ዶኣታ ጊዶን ዲዛ ጋሞይ፥ ባ ቶሆራ ኢጪ ሜንጮሬሊሽ ቢዛ ማላ፥ ሜንጮሬላይሳካ ኢዛፔ ኦኒካ ዋሊ ኤካናስ ዳንዳዮንታይሳ ማላ፤ ዳሮ ዶርሳ ጊዶን ዲዛ ዋዳላ ጋሞ ማላ፤ ያቆቤ ዜሬላፌ አቲዳይቲ ሃንኮ ዴሬታ ጊዶኒኔ ዳሮ አሳ ጊዶን ሄሳ ማላ ጊዳና።

9 ኔ ኩሽይ ኔ ሞርኬታ ጸኒዲ ጶቁ ጶቁ ጋና፤ ኔ ሞርኬቲ ወሪካ ዳያና።

10 ሄ ዋዴ ጸሲ፥ «ታ ኢንቴ ጊዶፌ ኢንቴ ፓራታ ዳይሳና፤ ፓራ-ጋሬታካ ሙሌራ ዳይሳና።

11 ኢንቴ ቢታን ዲዛ ካታማታካ ዳይሳና፤ ኢንቴ ሚጸታካ ኡባ ላላና።

12 ኢንቴ ማሮቲዛይሳካ ዳይሳና፤ ሄሳፌ ጉዬ ማሮቴኬታ።

13 ማሴቲ ኬዚዳ ኢንቴ ኤቃ ሚሰሌታኔ ኢንቴ ኤቃሶሆታካ ታ ኢንቴ ጊዶፌ ዳይሳና፤ ሃይሳፌ ጉዬ ኢንቴ ኢንቴ ኩሽን ኦሊዳይታስ ጎይኔኬታ።

14 ኣሽሮ ጌቴቲዛ ኤቂዛ ሚሰሌዮ ታ ኢንቴ ጊዶፌ ሾዳና፤ ታ ኢንቴ ካታማካ ዳይሳና።

15 ታስ ኣዛዜቶንታ ዴሬታ ዋልቃማ ሃንቆን ታ ሃሎ ኬሳና» ጌሰ።

6

ጸሳይ ኢሰራኤሌ ናይታ ሞቲዛ ሞቶ

1 ጸሲ ጊዛይሳ ሲዩቴ፤ «ዴንዲቴ! ኢንቴ ሜቶ ዙማታስ ዮቲቴ፤ ዙማቲካ ኢንቴ ጊዛይሳ ሲዩቶ።

2 ዙማቶ! ጸሳ ሞቶ ሲዩቴ፤ ኢንቴኖ ቢታ ሚኖ ጸጸቶ ሲዩቴ፤ ጸሳስ ኣሳራ ፓላማይ ዴሰ፤ ኢዚ ኢሰራኤሌ ናይታራ ፒርዴቴስ።

3 ታ ዴሬዞ! ታ ኔና ዋሰታዲና? ታ ኔስ ኣዛን ቶሆ ጊዳዲና? ኣኔ ታስ ዛሮ አማ።

4 ታ ኔና ጊብጾፔ ኬሳዲስ፤ ኣይሌቴላ ቢታፌካ ዋዛዲስ፤ ኔና ካሊላና ማላ ሙሴ፥ ኣሮኔኔ ማራሞ ኔስ ዬዳዲስ።

5 ታ ዴሬዘ! ሞክሮ ካዎይ ባላቄይ ኢዛ ዘሪን ቢኦሬ ና ባላሚይ ኢዛሰ ዛርይሳ ኣኔ ዩሺ ቆፒቲ፤ ጸሳ ጸሎቴላ ኦሶ ኢንቲ ሻኪ ኤራና ማላ፡ ሺጸሜፔ ጌልጌላ ጋካናሰ ኢንቲ ሄሜቶይሳ ኣኔ ቆፒቲ» ጌዴሰ።

6 ታ ኣይ ኤካዳ ጸሳ ሲንፊ ሺቆ? ዴኦ ጸሳሰ ዋሰታ ጎይኖ? ጸጌቲዛ ያርሾ ኢሲ ላይላ ማራራ ጋላ ኤካ ባዳ ኢዛ ሲንፊ ሺቆሻ?

7 ኢሲ ሺ ጳርሾታኔ 10,000 ጎጊዛ ዛይቲይ ጸሳ ኡፋይሳንዴሻ? ታ ኢዛ ቆሆይሳ ገሻሰ ታ ባይራ ናዛ አሚዛኮ ታ ሽምፖ ናጋራ ገሻሰ ታ ኡሎፔ ዋዲዳ ዩሎ ኢዛሰ አሞሻ?

8 ኣሳ ናዉ! ኢዚ ኔና ሎኦ ሚሽ ቤሲዴሰ ጸሲ ኔፔ ኮይዛይ ኣዜ? ሎኦ ኦላና ማላ ማርቴላ ኔ ዶሳና ማላኔ ጸሳ ሲንፋን ኔኒ ኣሽኬቴላራ ባና ማላ ጌዴኔ?

ኢስራኤል ናይታ ቆሆኔ ጸሳ ሃንቆ

9 ጸሳሰ ባቦይ ኦዲዳ ኤራቴላ፤ ሲዩቲ! ጸሲ ካታማኖ ሂዝጊ ጸይጌሰ፡ «ኢዛ ሃንቆ ጉፊዛ ቆፒቲ፤ ሄሳካ ጊግሲዳይ ኦናኮ ዋዚናን ዋሲቲ።»

10 ኢታቴላ ኬላቶ! ኢንቲ ጌኔን ሺሺዳ ኢንቲ ሚሽ ዋርዶ ማካ ሚሻን ማኪ ኢንቲ ሺሺዳ ሹኒዛ ሚሻ ታ ዶጋኔ?

11 ባሌሊዛ ማካ ሚሽ ኦይኪዳዴ፡ ዋርዶ ማካ ሚሻ ካራጸቴን ጸንቲዳዴ ጸሊሳናሰ ታሰ ቤሲዜ?

12 ኢዚ ዴሬን ዴሬ ኣሳቲ ኣሰ ቆሂዛዴንታ፤ ኢዚን ዲዛ ኣሳይ ዋርዳንቻ ጸላ፤ ኢሰታ ኢንጸርሳይ ባሌሊዛ ኢንጸርሳ።

13 ሄሳ ገሻሰ ታ ኔና ጳይሳና ዴንዳዲሰ፤ ኔ ናጋራ ጌዶን ታ ኔና ላላና።

14 ኔ ማናሺን ካላካ፤ ኔ ቃንላይ ጮ ሚላ ዳና፤ ኔ ሺሻናሺን ኣይኮካ ኔሰ ሺቆና፤ ኔ ሺሺዳይሳ ታኒ ማሻሲኔ ቶራሰ ኣላ አማና።

15 ኔ ዜራና ሺን ማጻካ፤ ዋጋራ ሚላ ዛይቲ ኔ ጉምኣና ሺን ሄ ዛይቲዛ ቲዩታ፤ ዋይኔ ሚላ ኣይፌ ጽንቃ ሺሻናሺን ዋይኔ ኡሹ ኔ ኡያካ።

16 ካዎ ኦሚሬ ዋጋኔ ካዎ ኣካቤ ኬላ ዋጋ ኔ ኡባ ሺሻ ኦይካዳሳ፤ ኔካ ኢሰታ ሃይሲኤ ካላዳሳ። ሄሳ ገሻሰ ኔና ጳይሳሰ፤ ኔ ዴሬዛካ ታኒ ቂዴሰ ኣላ አማና፤ ዴሬይ ኔ ቦላ ቂዲ ካኣና።

7

ኢስራኤል አሳ ዋዬ

¹ ታና አዩ አና! ዋይኔ ሚላ ጊዳፌ ማጸሺን አቲዳ ሚላ አይፌ ቦኔ ቆሪዛ አሳ ማላ ጊዳዲስ፤ ሜቲቲዛ ዋይኔ ሚላ አይፌይ ዳና፤ ኑ ኢዛስ አሞቲዛ ኤሌሊ ጋኪዛ ባላሴ ሚላ አይፌይካ ቤቲቤና።

² ጸሳስ ባቢዛ አሲ ቢታ ቦላፌ ቆይዴስ፤ ሱሬ አሲ ኢሳዴይካ ባዋ፤ አሲ ወሪካ ሱል ጉሳናስ ዙጌስ፤ ኢሲ ኢሲ አሲ ባ ኢሻ ያርዴን ኑይከስ።

³ ኢዛ ኩሼይ ኢታ ኦላናስ ታማርዴስ፤ ዴሬ ሄሚዛዴይ ኩሼ ጌንላ ኮዬስ፤ ፒርዲዛ ዳናይካ ማታኤ ኤኬስ፤ ዋልቃማቲ ባና ኮሺዳዚ ኦልቲስ፤ ወሪካ ኢሲ ቦላ ዱላቲቲስ።

⁴ ኢስታ ጋርሳፌ ሎኦ ጌቲቲዳዴይ አጉንሳ ማላ ኬሂ ሎኦ ጌቲቲዛዴይ ቃሴ ኪንዲቾ ማላ ኢንቲና ናጊዛይታስ ዋዴይ ጋኪዴስ፤ ጸሳ ፒርዳ ጋላሳይ ጋኪዴስ፤ አሳይ ሺርታና ዋዴይ ጋኪዴስ፤

⁵ ኔ ላጌ አማኖፓ፤ ኔ ላጌንካ አማኔቶፋ፤ ኔ ኪኦን ኔናራ አቁዛሪስካ ኔ ዮቲዛዝ አኬካዳ ዮታ።

⁶ አቱማ ናይ ባ አዋ ካቆና፤ ማጫ ናይካ ባ አዪ ቦላ፥ ና ማቻካ ባ ቦሎቲይ ቦላ ዴንዳና፤ አሳስ ሞርኬይ ሶ አሳ ጊዳና።

⁷ ታኒ ጊዲኮ ጸሳ ሂደታ ኦላይስ፤ ታና አሺዳ ታ ጸሳ ናጋይስ፤ ታ ጎዳይካ ታስ ሲያና።

ጸሳፌ ዪዳ ማርታ

⁸ ታ ሞርኬዘ! ታ ቦላ ጋኪዳዚ ኔና ኡፋይሶፎ፤ ኩንዲኮካ ታ ዴንዳና፤ ታ ቆማን ኡቲኮካ ጸሳይ ታስ ፖኦ ጊዳና።

⁹ ታ ኢዛ ቆሂዳ ጊሻስ ኢዚ ታ ጊሻስ ኤቃና ጋካናሲኔ ታስ ፒርዳና ጋካናስ ጸሳይ ሃንቁቲኮካ ታ ዳንዳያና፤ ኢዚ ታና ፖኦን ኬሳና፤ ታኒካ ኢዛ ጸሎቲል ቤያና።

¹⁰ ታ ሞርኬዛካ ሄሳ ቤያንዲስ፤ ኢዛ ዬላታና። ታና፡ «ጎዳ ኔ ጸሳይ አዋን ዲዜ?» ጊዳሪ ኩንዴል ታ አይፌቲ ቤያና፤ ኦጌ ኡርቃ ማላ ኢዛ ዬዴታና።

¹¹ ኢንቲ ኢንቲ ካታማ ጊምቤ ጊምቢዛ ዋዴይኔ ኢንቲ ቆሲካ አሲዛ ጋላሲ ያና።

¹² ሄ ጋላስ አሳይ አሶሬፔ ጊብጾ ካታማታ፡ ጊብጾፔ ኤፌራጺሴ ሻፋ ጋካናስ፡ አባፌ አባኮ፡ ዙማፔ ዙማኮ ጋካናስ ኢንቲኮ ያና።

13 ኢስታ ኦሶ ጌዶኔ ኢዚን ዲዛ አሳ ጋሶን ቢታያ አይኮይ ባይንዳዝ ገዳና።

ጋላታኔ ዋሳ

14 ዋራ ገደኒኔ ጨለላ ማታ ገደን ባርካ ዲዛይቲ ኔ ሜሄ ገዲዳ ኔ ዳሬታ ኔኒ ኔ ጉፌራ ሄማ፤ ቤኒ ዋዴ ማላ ኢስቲ ባሳኔኒኔ ጋላአዴን ሄማቴቶ።

15 ኔ ካሴ ገብጼፔ ኬዚዳ ዋዴዛ ማላ ታኒ ታ ማላታ ኢስታ ቤሳና።

16 አይዛቤቲ ሄሳ ቤያናኔ ዬላታና፤ ኢስታሰካ ዋልቃይ ዳያና፤ ኢስቲ ባ ዶና ባ ኩሼን ቱጫና፤ ኢስታ ሃይሒካ ቱላና።

17 ቢታ ቦላራ ቲራን ጎሼቲዛ ሜዴቴላታ ማላ፥ ሾሻ ማላ ኢስቲ ቢታ ላጫና፤ ባ ዲዛ ጎንጎሎ ገደፌ ኮኮሪሼ ኬዛና፤ ባቢሼ ጎዳ ኑ ጸሳኮ ሲማና፤ ኢስቲካ ኢንቴሰ ባባና።

18 ዳይሼ አቲዳ ዜሬላ ናጋራ አቶ ገ ማሪዛ ኔ ማላ ጸሲ ኦኔ? ኔኒ ሜርናሰ ሃንቄታካ፤ ማሮ ጌሊዛይሳን ኔ ኡፋዬታሳ።

19 ሲማዳካ ኑስ ኔ ቃዴታሳ፤ ኑ ናጋራካ ኔ ቶሆ ጋርሳን ዬዳሳ፤ ኑ ቆሆዛካ ኡባ ጌዴ ጨማ አባ ገደ ዬጋሳ።

20 ቤኒ ዋዴፔ አይካዳ ካሴ ኑ አዋታሰ ጫቆ ቃላ ኔ ጌሊዳ ማላ ያቆቤሰ አማኔቴሰ አብራሃሜሰ ማሮቴሰ ኦሳሳ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b